



Editorial

Sukling zawlo dinga det takin um inla sepgimna chu thawn puan'a.

1 Kor 15:58.

Pathian hepina leh mapuina zalin kum leh thate hung chia zel in, kumkim ahung hi tak tawh kitawn in, zia tiang I mau eipui piak Pa Pathian chu lopina leh chawihawina I pe masa'u hi.

Chun, tulai ka ngaituana um zing khat chu mihingte hi khawvel ah ul-sa pawt ah nek hawl ding ihui ti thupiak i higual un tha masa ah chun class X leh XII result te a hung pawt in, khen khatte chu lawtinna changin kipak ma ma ding ahiu. Chun, khen khatte chu lawtingzo talo a lungthim ngui leh chau in a um ngei ding un ginchak a um hi. I um nau khawvel hi ki taitetna khawvel ti thei khawp hial a hinkhua mang ihitak ziakun, I chan chung ua hin thawkdan thiam a thil lemtuak dan le thiam apaw-imaw khawp mai hi.

Lawting zo talo:

Mihingte a dinga lawting zotalo ti hi zachak um pen pente laka ila ngaitua'u khat chu ahi. Ahinla, tulai taka mi minthang mama Billy Graham ngei le pawl sawm exam ala fail a, himaleh zakcha kisalo in ala pang tun tun a, Pathian hiatna zal leh pan a lak tun tunna zal in tuni'n khawvel pumpi mihi-at khat a hung hi tai.

Chun, lawsapna hin mihingte malam pan lak thak ding dan hawi takmai ei kawku mu thei in a pang hi. Khat-vei ilawsap man ah kimawkn gaisiat ziang ding hilo in, zia zachatna I thawkte chu tawh i lungthim natnate apat chun, panthak la'n, tuni zachakna ka thuakte hi a vel a tuak kittalo ding in aw! ti a kitilkho a ngai hi. Lungkhamte panpi ding in

Pathian kisa zosa um ahi tawh kitawn in “Sukgentheina tamtak thwak pum ah Pathian gamlut ding him uh ahi” (Nasepte 14:22)

Lawting zotate:

Lawtinna kiti hi mihi-am a ding ah thil kipak um leh chanchin dawi um pen khat chu ahi. Mi lawting thei kiti chu ama kipat titak takna um in, haksa maleh thwak tun tun in malam ah kipakna ding thil zing kawm in genthei haksatnate thwak a pan hung la theite chu ala hi nuam deu sek ui.

Lawtingna hung chang tate chu, a kipak man uh amu uh le ahimai ahi. Zia chan theina ding a chun, gentheina chuam chuam thwak a ngai hi. Etsakna’n, lawi leh pai, phone, T.V, gualnawpte tawh ki gamlat deu a ngai hi. Chun, hun a tamzawte lekha simna mang a, tu pet a genthei maleh khawnung leh ka lawtinna ding ti ngaituana nei a, zum

leh za khawksalo ah pan ha lak ah hunglate chu ala hi nuam deu sek ui.

Titak takna nei a pawimawi hi:

Pathian in mihingte hi a hepi mama hi. Chun, a siam sate hin ama lamah i chia theina ding ua, genthei chitinte thwak pum a pan la tuntun a ama ginglalo kei ah pilvang taka hinkhua mat ding ahin ei dawisak hi. I lampite ngei le ki siam zang ngai intin, I lungthim ua, bangti’n em zia thilte hi ka lau ding, bang zia in em ka mu zawlo ding tia ngaituana nei a pawimawi hi.

Thilkhat tupna i nei ahi chun, I chiana taphawt ah lamzang theina ding in, chia zing i hilai in i changlam a hem leh i veilam ahem in thil ei subuai theite lak kipat in petmang da ham ham in pan la zing thei leuhin lungtup mualsua ngei hitiu.

Hangsan tak leh hat tak a din-

det a pawimawi:

Tupna neite chun, hawitaka ki ngaituana nei pum a, zia i thil tupnau apat chun khawvel nunnawpna leh zalennate maimai in ei sukling zawlo dinga dettak ah pan i lak angai hi. Tuni genthei i thuakpina chun damsung in kipakna ei pethei ahi ti hiatmillo ding in a phai.

Tupna nei mi khat chun thil dang in a pet mang ngai puan, zia athil tup chu a lungthim in a zik lut in, a um na zosia hemillo in a ngaitua zing hi. Bang gual in a lampi puikawi thei tam maleh hat tak leh hangsan tak ina ding det hamham sek hi. Ama lungthim tawm tak ah tu himaleh, titak tak nei ahiziak in Pathian chun lopitak in a hung siam dawk sek hi.

Thukhakna:

Thil bangkim hi Pathian in a la lemguatsa chu ahi tai. Himaleh ei ma apat ti tak

takna leh pan lak taktakna a umlo chun, banggual in tup le hin le lawting diaklo ding i hi ti hia'n khatvei lawsap ziak ah lungkhama kingaisia kithada mailo in titakna leh gunchuna nei kawm in panthak latozel leuhin Lalpa'n ei a ding ah lem a ti hun in lawtinna chu ki chang ngei ding ahi. Chun, lawtinna changtute'n le tu i lawtinnateu hi ki at pi ah hun tawksa mai lo in; ei lawtin sak tu Pathian kipakna ding ah matgua'n malam ah maban tampi nei nalai i hinau tawh kitawn in; nisin hinkhua ah Pathian ngaisakna tawh kithua ah titakna, gunchuna, tawmngaina leh ginumnate haw hi ki vawp zing chiat leuhin sukling zawlo ding khawp ah det tak ah um in, I sepgim manteu chu thawnlo hial ding ahi.

.....xXx.....

Kochuamte Luchang chu

Khrista ahi

(I Korinth 12:27)

~Rev. Dr. Hangpi Manlun

1). Thumapui:

Thuthunglui hunlai in Pathian in Israelte kha zia leichung ah nam chuamchuamte leh mihing zosia laka kipat in bawlding chuam anei zia kin ala tel chuam a, zia chu khawvel pumpi ah vakna tuntu ding, thimnuai ah umte chu khawvâk musak dingte leh ama mi leh sate a hitheina ding uh ahi. Zia chu Edhah ahilole Qahal ti'n a kiminvua hi. Ahin a mitel Israelte'n athupiak azui nawplo ban ua, amau ading a piak a um Messiah a nawltak zia kun Pathian programme chu Israelte chungah a lawsam tai.

Chun, Thuthungthak hun in, Kochuam genna kimang thumal chu Greek pau in "Ekklesia" atiu a, a umzia chu ahileh, 'kochuam/kipawlkhawmte' tina ahi. I gensa gual un Israelte ala lawsap tak zia kun, Pathian in

Thuthungthak hun in Israelte thasang dingin, ei kochuamte, A chapa thisan zalin ei siamta ahi (Nasepte 20:28; II Kor. 5:1-9). Pathian in leichung pumpi a thil zosia a siamlai in, A kam ah thumai in alasiama, Ahin kochuamte ei siamlai in A chapa thisan kipat in ei siam ahi. Banggual lawm ah thupi leh mantam i hiu em le?

Kochuam chu Khrista taksa ahiziakin lu (head) khat maimai a nei a, zia chu Khrista ahi. Ahin, Lalpa Jesu chu luchang ah neilo ah mihingte'n Jesu pan mun ding i lua khak ding uh thil tizat um leh daum tak hiding ahi. Mihing hina ale luchang umlo in a kihing thei pua, na leh akisem theilo ahi. Mihingte hawina leh kilawmna le i luchang ua um ahi. Ziaban ah mihing melhawi leh melisia kihetna le amel bep ahia, a duangting in lian maleh amel hawilo leh kingaisanglo ahi.

Ziagual ah chun, kochuamte leh ei Khristianten le Lalpa Jesu chu luchang leh phaw ah i nei tak ua midangten Pathian hawina eimau ah kipat hung muding ahui.

2.). Kochuam chu political organisation ahi keipuai.

Kochuam chu khawvel gam ah kipawlkhawmna mai ahi puai. Worldly church hilo in Spiritul church jawk ihui. Thugentu khatin tulai in, “Kochuam ka en a, khawvel ka mu, khawvel ka-en a kochuam kamu’i” ati ahi. Agen nawp pen chu khawvel leh kochuam a kilebul tai, tina ahi. Lawngpi chu tuichung a kitawl ding a siam ahia, ahin akek a tui asung ah alut leh sawtlo kalin tum mang ding ahi. Ziaguala-chun, kochuamte le khawvel ah um ihui a, khawvel thu leh vaihawmnate’n ei luakhum phat le Lawngpi chu sia’n tum mang thei ding ihi. Rev. Vanlalngaka in, “Kochuam chu a hiding gual taka a um leh khawvel ah movement hatpen ahi” ati ahi.

Nidanglai in kochuam puitu khatin a lamkaina ah chu thagau panglo in ka puak ahi, ati mai a, thagau panglo ah kochuam puitute aga uh mu ding atam bek puai. Pastor khatma in thagau lam SDO ka hi tite paukam in ala mangthei ahi. Ziagual chu khawvel gam vaihawmna umzia ahia. kochuam vaihawmna leh paukam mat ding dan le a hipuai. Chuleh puitu hina ziaka vaihawm a i pan sawt leh sawtlo chu apawimaw pen ahipua, i pan sungin gasua i nei nam? ti chu a pawimaw zaw ahi.

3). Tulai kochuamten i thagau mitnau leh thagau thiangtho thumna kimsuata abang hi.

Masanglai a Lalgam nasemte, a diakin nungjuite’n Pathian Thagau Thiangtho thumna tawh na a sem ua, damlote kiangah, “Sana dangka ka nei puau, ahin ka nei sun Jesu min in la keng in lamzawtta’n ati phat un” kengbaite’n lam ala jawtthei mai uh ahi. Peter in le Pentecost ni’n Thagau Thi-

angtho thuamna tawh sermon khat vei mai mai agen leh mi sangthum valte'n pianthakna achang u'i Ei uh vang Thagau Thiangtho thuamna tasam hi ding i hitau a, thu sangthum val bang gente'n le Thagau mangthai khat le kiman jolo phial ahitai. Akibanglo khat vang um hengei ding ahi.

Nikhat Thomas Aquinas in Pope a vave kha, sum tamtak alasim a, kisuangla tak mai in, Pu Aquinas, "masanglai a nungjuite hun lai gualin, sana dangka ka nei pua" ti hun hitalo ahi atile, aman le "ahima ahi, amau gual in Jesu min in la keng in lamjawtta'n" i titheita puau, atisan dai tai. A umzia ahileh kochuamte leh Pathian nasemtute'n Thagau lam a i power uh imansua tau, tina ahimai hi.

3. Tu'n Jesu luchang a nei leh neilo kochuamte umdan vak suikhawm hitiu:

3.i). *Jesu luchang ah neite chu vaihawmna ah i Thagau mitna uh isuklang zelzel ding uh ahi.*

I het taksa'u gual un ko-

chuam tin ah vaihawmna chu i ngaikhawk uh chu a hawi ma ma ahi. Ahin Pathian panglo a vaihawmna chun ga asua thei taktak puai. Ruth 1:1 ah, "Vaihawmte'n vai a hawmlai un kial a kia," ati ahi. Tulai in vaihawmna chu Pathian nasepna sangpen ah ngai hilen akilawmta , mizosia vaihawm ki ut in kitha nuam thei ma ma ahi. Ahin ei kochuamte vang Pathian mapuina tawh vai ihawmlo leh Thagau lam basapna leh kial leh chak tuntu mai kihibep thei ahi.

Chuleh Committee leh meeting a ipan phatle lawitum siamna vai, (groupism) lamkaite mai et leh be-le-phung a vai ah vaihawm lou ding ahi. Tulai ah daum mama khat ahileh thudiklo hena zenpi a hun taka gen ngamlo tite chu dukdaklona chikhat ahi. Kochuam leh pawlpi khat in aiawh ah a hung guat/sawl phat le i kochuam dan leh dun leh ihiatte i panpi tinten ding uh ahi. Kua hem khat mai et ah, mikhat sakhau(pocket) a i saltanlo ding uh ahi. Tulai

Lalgam na isepna ua Pathian lungthim leh dawigual etsang in puitute maipha et leh mu ding itup uh hileh akilawm-ta ahi. Gin um ding ah min aguatte ahung gin umlo phat ua le igam i lei a ding inle niam kiakna chikhat ahisek hi. Chuleh Pathian dawigual chu bang ahem ti ngaitua kawm ah a diklo a ihetteu chu hangsan taka i gen ngam ding uh ahi. Ziagual ah puitute i ding ngamlona ziakun kochuam vaihawmna le khawvel (politics) vaihawm-nate sang in a a kidak umzaw-kna leh gen leh sak ding tampi ahung umthei khawlaw sek hi.

3.ii). *Jesu luchang ahneite chun kingainiam tak in Lalgamna a sep ding uh ahi.*

Lalgam nasepna ah chun i nasep ding uh leh Pathian chu a pawimaw pen leh lianpen a hiding lai in, khenkhatte'n i law(pay)-te, minphatnate, letna lalnate chu alian pen in i ngaitua sek ui. A chang leh Vangam ah kua a lian pen diam? tisang in leichung ah let-le-lal ding kichu in i pumbuai den thei sek ui. Ziaban ah

kochuam vaihawmna leh hotu hina chu khawvel mite gula letna lalna dinmun channa hilo in, suak nasepna (servanthood) ahilam bang a chang le kihemil thei sek ahi. Chuleh, gingtu lamkai tamtakte'n i dinmunteu chu Lalgam kekletna ding sang in, mani hamphatna ding, thuneina ding, mite maipha etna ding, eima-le-eima kichawisangna ding, khenkhat vang in midangte gawtna ding a imangthei sek ui. Adiak in Pathian nasepna chun tup lehngim khat nei a Pathian na asepa tak ua le atup uh atunlo phat le thasiatna leh pitinlona ah apuilut jel sek hi. Ziakachun, eima sang a i nasep chu apawimaw jawk jing ding ahi. Sawlchak Paul in, "Ka nasep ka ngaisang a, ka chawi hawi hi' ati ahi. (Rom 11:13-14).

3.iii). *Jesu luchang ah neite chun Kipumkhatna anei u'i.*

Tulai gamtin leh muntin a kochuamte lak in Setan in na nasatak in asem a, zia chu kochuamte kipumkhat saklo ding ahi. Nidanglai in India gam ah Khrisianta a masawn un a

khangto mama ua, zia laitak chun Unau Hindu lamte chu patau in sukchimit ding bang lungthim a nei lai un, India President khatin “lungkhampi puai tiu, Khristiante chu a et in etthaw len amau-leh-amau hung kido intin uh, hung kek jak thotho ding ahiu” atisan hit het tamai hi. A dik mama mai a pankhawm sangin kikhen leh kituaklo tite chu kua kochuam inle i bawl thei chiat uh a bangthim tai. Zia leichung i damsung hun chawmcha bawn i kituaklo leh i thinung phat ua le kumtuang tuang ah ah vangam ah umkhawm dingte bang i suak ta diam uh le? Lalpa Jesu’n “Setan le ama leh ma a kido leh bangtin a hat diam?” ati ahi. Ziagual ah chun ei gingtute le lungthim munkhat pu’h i umlo ahi chun khangto theilo ding i hiu. Thupil in “pankhawm hatna ahia, kikhen pukna ahi” ati ahi. Zia banah kochuam kingakna foundation chu “kilungsiattuna” ahijing ding ahi.

3.iv). *Jesu lutang aneite khu ama uh leh ama uh kimanghil*

na hinkhuo anei uhi.

I Lalpa Jesu’n a nungjui dingte chu mani kihemil jen ah ama juiding ahi thu agen hi. Etsakna ding in world cup in, football kipekte’n abawn un goal khum gawchiat jiang leu hitheilo ding ahiu a, a thiamte’n amau minthangna ding channgam khawp ah a lawite a piak(pass) phat ua le bailam tak in alawite’n goal ala kumthei a, tichun lawtingna a chang sek u’i. Tulai mitam takte credit chan gawtei tei i tam ziak un a buai um ma ma hi. A diakin zia hi kochuam puitute lakin a tam nuam ma ma hi. Minthan utna, bawlthei hi utna, leh midang chung ah lenguatnate ziakin kochuam ah tidamlona a tun nuam ma ma hi.

Baptisttu Johan kha a hunlai in miten Messiah hiding in agingchau a, ama’n kei Mesiah kengtaw khau pheltak le ka hi puai, ati ahi. Ziagual ah chun Jesu a chawihawi ziakin Jesu’n ama le chawisang kit in, “Numei suan ah piang lak lak ah baptisttu Johan a thupi pen

hi” ati ahi.

Ziabanah chun, Thuthungthak lekhabu ah Marka le a hunlai in kuama’n a he taktak puau a, ahinla ginum taka Jesu a jui ziakin, Bible Thuthungthak lekhabu panina ziktu in a pang hi. Tulai Bible zilte vang in Thuthungthak lak ah Marka Lekhabu hi a kizik masapen a, a diakin chanchinpha bu dangte’n Marka zik ah pat a laksawn uh ahi tile a mudawk u’i. Ahuntak in mite’n hephalo lehle Pathian in a vainung in a hung dawmsang kit tho tho ahi. Ziakachun, ei unle Lalgam nasepna ahin gi-

num tak leh kingainiamna hinkhua tawh Lalpa na isep jing ding uh ahi. Rev. Dr. (L) Chindokham in, “Nang dawp sangna khut chu avang ahi ziakachun, pilvang in ahilole ketha kha ding la hi” ati ahi. Chuleh, Sadhu Sunder Singh in, “Khross gin umtak a dawmsang jingte, Khross in le ama ni khat ni phat le dawmsang ding ahi” ati ahi.

Lalpan simtu zosia ei malzawl chiatta hen. Amen!!!

.....xXx.....

**Tulai mitam takte credit chan gawtei tei i tam ziak un a buai um ma ma hi. A diakin zia hi kochuam puitute lak in a tam nuam ma ma hi.*

**Tulai ah daum mama khat ahileh thudiklo hena zenpi a hun taka gen ngamlo tite chu dukdaklona chikhat ahi.*

JOB HINKHUA APAT: Pathian mi pa/Pathian minu (Thagau mi).

~ Pro. Pastor Pauneithang.

Thumapui:

“Uz gam ah chun mi pakhat a um ah, a min chu Job ahi. Zia mipa chu demna bei leh mi diktat, Pathian lau thil phalo him him bawl ngailo mi ahi’n.” (Job 1:1)

Job hinkhua apat Pathian mipa/ Pathian minu ti mangcha, Pathian in a chate bang gual a thagau lama Khristian hinkhua kimangcha dinga ei dawi dante en khawm hitiu. Pathianin a Chapa Jesu Khrista thisan a tat, a chate zosia hi, Jesu guala um dinga ei dawi ahi. Pathian kihidi tina vang ahipuai. Ziaziakachun, Jesu’n sual apat ei taddawna hi a lopipen ahina ban a, bangkim a ettawn dinga le Pathianin a hun sawl ahi. Jesu gual gual a thagau lama piting dinga, Pathianin ei dawi ahi. Jesu bangchet chu jia khawvel a hin hizolo maleu hin, I bawn ua Jesu bang deu deu dinga, thagau lama I khanto zing ding uh chu Pathian kipak nalam tak ahi. I Bible un vang pha bukim dinga ei phut tawp ahi. “Tichun, la Pau Van ah um a phat bukin gualin, nang uh le pha bukin in um un,” a ti ahi. (Matthew 5:48)

Job hi I Bible in “demna bei” atileh chu “mi pha bukim” chu himai ding dan ahi. Pathianmi chu Pathianin pha bukim dinga ei dawi ahi. I mimal, I insung, I khawtang leh I Kochuam ale phatna, diktatna, Pathian kichakna leh sual huatna/thetna hin, iki tilkho ua, I kawisang ding uh ahi. Job lekhabu

apatin Pathianin a chate bang gual mi hiding a ei dawi ahi em, I hetthei khenkhatte a ban ban in en hitiu.

1. Job lekhabu hi Bible a lekhabu 66 laka, lekhabu kiziak masapen ahi.

Job hi Abraham masang lampek a um ahi. Job hi Pathian mi masapen laka Enoch tawh

Noah zaw ah ama ahi. Job hun lai chu Noah tawh Abraham kikal ahi. Mithiamte'n Noah chapa Shem tawh le Job hi ki pawl dingin a gen uh ahi, zia hunlai a chu Job um ahi. Thilsiam Thu (Genesis) Bible a amasapen a kikawi saw Mosi zia ahi. Abraham zaw, khang bangjat ahem chia nunga Mosi hung piang pan ahi. Job ahileh chu Abraham pian masang a khang bangjat hem masang a khawsa ahi. Ziakachun, Job lekhabu hi Job damlai a zik ahiloleh, a thi nunga sawtlo a zik hiding in gingchak ahi. Ziaziak chun, Job hi Bible a lekhabu masapen ahi, iti thei ahi.

Bible ah alai lunga a um zia ahi, Labu lak: Job, Sam, Thupilte, Thugentu, Solomon la tiho laka abek ah kikawikhawm ahiziak ahi. Job hi khang tamtak nunga zik ahilona ding chu; a lekhabu sunga, Job a zi tawh a kiholimna haw, adit adet ah a um zia ahi. "Ziaphatchun, a ji'n a kiang in, "Tu'tiang ah hingle ginum nalai lai ding la hem? Pathian chu hansia lawkhum inla, thi'suk mai ta'n, ti'n a gen

a." (Job 2:9) Ji tawh pawsal kal a kiholimna haw khang tamtak nunga suidaw chu gingchak umlo ahi. Zia zia ahi, Job hunlai tuam a zik hiding ahi. Chuti ahi chun, Job hi Bible a lekhabu kizik masapen iti thei ahi. Zia chu ahileh, I geldaw ding ua pha chu, Pathianin, a lekhabu Thiangtho a azik masakpenna agen ut leh tup chu bang ahidiam? A Bible ah a zik ut masakpen, a lunglai a um chu, "Pathian mipa Job" chanchin ahi. Pathian in Enoch hunlai ale Pathianmi (Thagau mi) a hawl a, Noah hunlai ale a hawl, Job hunlai a le ahawl ahi. Ei uh hunlai ahin le a chate laka, thagau mi, Pathian mipa/ Pathian minu a hawl ahi.

2. Pathianin mimal hinkhua hi a gel pawimaw ahi.

Kapa Kochuam lamkai ahiziak ahem, ahiloleh Sunday School hotu ahiziak ahem, ka nu leh pa Pathian mi ahiziak ahem un vangam lut ding akihi puai. Mimal tawh Jesu kal bep ahi, mimal a Jesu Khrista lal leh hukdampa pawmte bep chu hukdam hiding ahiau. Paul

inle mimal hinkhua pawimaw dan Timothy kiangin a gen ahi. “Khrista Jesu a ding ah se-pai pha.” Ding in a tilkho ahi. (Tim.2:34)

Sepai hi mimal titna (fitness) dungjui a kila lut sek ahi. Mimal hinkhua hi Pathianin a gelkhawk ma ma ahi. “Pathian kochuamte, Jesu Khrista taksa bakte ka hiu”, iti maithei. A dik hi, Pathian in Khrista taksa, a Kochuam a nasem in, a taksa bakte thilpiak jatchuam chuam a pia ahi. Ahin Khristian khangthu I sut ahi chun, zia a taksa, a kochuam a dinna dinga chun, Pathian in mitamtak hilo, mi pakhat bang a mangcha sek ahi. Apostle Paul hi ngaitua tiam un, bang gual a Pathian Kochuam hi a mang(loss) diam, Paul kha Paul ahi gual a la hilo leh. Apostle dangte le Pathianin a mang hi, Paulin Thuthung Thak a sang danglam zo ahi. Thuthung Thak lekhatawt sawm pathumte haw khi Paul bep mangcha zik ahi. Pathianin mimal numei leh pawsal ama a dinga ginum a dawih ahi. Job le ama mimal a Pathian a dinga

a ginum zia a, a chung a gim huaisia thuak maleh Pathian a kipak ma ma ahi. Job dinmun ahin, mizosia, a hunlai a Pathian thugente haw, leh a ji na ngawn inle, Pathian a ginna phatsan dingin, a lang pansan ahi. Ahin Job chu Pathian lunglam tak a hinkhua mang ahi.

3.Pathian in a chate, Pathian mipa/Pathian minu ahina ding ua, tuak a phal khenkhat te en hitiu.

i). Mi kuale Pathian mi (Jesu nungjui) ahi ding ahichun, Setan suknawmna (attack) dinga le Pathian in a phal piak sek ahi.

Pathianin phalna a piak phat phat in, Setan in a lo lama a gangualte, a suakte, a ban a chun, a insung mite, a chate (chapa 7 leh chanu 3), a bawn un nikhat thu'n a sumang vek ziang ahi.

Pathianin a taksan dungjui a, a phal tiang Setan in a sawisa ahi. Job taksa chung a meima(ui-lut), a lu apat a kengtaw tiangin sawisak in aum ahi. Pathianin a Chapa changkhat neisun Jesu Khrista ngei le, thi tiang in a thawk a phal ahi. Kumtuang

hinna I neina ding un. Pathianin nang leh kei le bang tiang a thawkna ei phal piak em ti kihiat chian a pawimaw ahi.

Hetding khat chu, Pathianin I ginna tawh kidungjui in thepna ei tuaksak phal ahi. I zaw ding tiang bep a phalsek ahi. Gingu tamtak chu, thepna iki pelutzo sek uh ahi. Thepna chu do le hin, Thagau Thingtho thahatna suangin, Pathianin zona ei pe ding ahi. Pathian mi Job chu mi phabukim, diktak a khawsa, Pathian lau leh gitlona pat kisumthei tak ahiziak in Setan in a hua ahi, sukmanthai a nuam ahi. Maleh, Pathian chu a ginum ahi, thepna tawh kigun in, a mite ginum tak a umte chu, galzawna a pe sek ahi. Hal-luluiah!

ii). Pathianmi chu mite haw, a Khristian chanpite ma ma le hi-atthiamlona, muthiamlonate ho a tuak le phal ahi.

Job hi mi neinung leh minthang tak ahi, a lawite ama hunlai a thugen minthang ma ma Eliphaz, Bildad, Zophar leh Elihu te'n Pathian in Job thawkna a abitup (purpose) a heth-

iam zolo uh ahi. A gensiau a, a diklo in a ngaw a. Zia chu izil uh ahi, Pathian mi chu sakhua mi atam zawn a hethiam puau ahi. Mi hiatthiamlo hi utlo chun Pathianmi hilo mai ding dan ahi. "Ahin, kuale Khrista Jesu ah Pathian ngaisak ah um gaw tapo chu sukgenthei hiding a hui." (2 Timothy 3:12).

iii). Pathian mi(Thagau mi) lampi chu haksatna, thokna lampi ahi.

Lal Jesu'n kua'n le ka nung a jui ding chun, ama leh ama kihemil in, nisin a Kross kiput in eijui hen ati ahi. Jesu ngei le, "Mite musit leh pampai in ala um ta'n; mi lungai leh natna dim ahi." (Isai 53:3) Thi tianga thuak in Kross in ala thi ta ahi. Jia gual a chun Krista melchikna Job a um chu, a ginna ziaka mi zosia hiatthiamlo in aum a, taksa'n a thuak, a pum a meima (uilut) in a dim, Lungthim leh Thagau lama le thuak mualsua ahi. Nang le kei le Krista a zung phudet a, thuak hattak a, Lalpa hung masia ngak ding a um dingin kisai tiu.

4. *Sakhua mi leh Pathian mi (Thagau mi).*

Sakhawmi chu Pathian he tina hilo ahi. Sakhua mi chu Pathian chanchin he, Pathian thu le he, ahi vanga Pathian helo ahiu. Gingtu tamtak le ziagual chu ahiu. Zia haw zosia lak a chun, gingtu Pathian he a um kit ahi, Pathian inle a het, kilawi chan a um. Zia gual chu ihichiat ding uh ahi. Pathian he mi lahi chun, Pathian chanchin bep heten hun hethiamlo ding uh ahiu. Bible lekha hiat a heten hun hethiamlo ding uh ahiu. Sakhawmite'n tisa mi le hung ti ding uh ahiu. Ngaitua tiam hitiu, Pathian chanchin Bible a hesuak kei jiang, Mosi dan le etlo a gensuak thei jiang ten, Lal Jesu khawvela a lenlai in 'Beelzebul', (Setan) ati thei mai uh ahi. Pathian thu het chu a pawimaw taluai, insung leh kochuam a kitil hat ding ahi. Ahin Pathian hemi ihi ding ahi. Pathian hete chu, Pathian inle ahette ahi sek hi.

5. *Pathian in Setan kiangin Job (Pathian mi) chu a Suakpa ahi, kiatpi takin a kawngam ahi (A*

Pathian hi ding a jakcha puai).

Lalpa'n Setan kiangin, "Ka suak Job saw la ngaitua kha em? Khawvel ah hin ama tawh bang ah pha bukim, thutak, Pathian lau leh thil phalo lak ah kipat kisum thei mi umlo ei vei," t'n. (Job 1:8)

Tulai khawvel gam (nations) tamtakte kisanpi chu, thuneinate, galvante, sum leh pai haute, In leh lo, nei leh go haute atangpi'n ahi sek hi. Ahinla, Pathian in a pawimaw a kawite chu: 1. Pha bukim mi 2. Thutak 3. Pathian lau 4. Thil phalo lak a kisum thei. Nangle kei inle zia quality pali te hi mani hinkhua kien chian a, zia gual quality chu I nei ding ahi. I ngaisan ding le ahi.

6. *Pathian mi Job in a chate Pathian mi (Thagau mi) hidin-gin siam piting ding a gelkhawk ahi.*

Job in a chate'n luaithe na haw a nei zaw sin ule, zingkal matak a tho in, a chate a dingin Maicham a siam zing sek ahi. Job chun, "Ka chate hin thil phalo ala bawl kha pal in, a lungthim un Pathian a la sam-

sia kha tawl in au,” a ti zia kahi. Job 1:5.

Tulai insung leh khawtang buaina haw I et ahileh, pawlam buaina ahi I buaina teu; addict nunga buaipi tihaw, kijeptua, insung kibulu, ki that ti haw bang ahi. Pathian mi Job buaipi ahileh vang, lungsung lama sualna sukbeina dinga buai ahi. A chate lungsunga sualna umtheite, a um khak leh sukbei dinga zing sin in maicham siam in Pathian tawh akiho zing ahi. Khawvel hi buaina lam mano maleh, Kochuamte, Job hinkhua apat hin, sunglama mani leh insungmite maicham siam zing thei ding in pan lai tiu.

7. Bible lekhabu te lak a masapen Job sunga hiat dinga poimaw khenkhat te:

i). Job lekhabu pek masapen a chun, Pathian mi Job in Pathian a bia (Worship) ahi. Gingtu khat ihi leh Pathian biak di hi I gel pawimaw pen ding khat chu ahi.

ii). Pathian mi (Thagau mi) hina dinga, genthei ding leh chaga tei tei ding ti ngaidan

la nei khak ahi chun, Bible a lekhabu masapen a Pathian mi pa (Thagau mi) hi Mi hausa ahi.

iii). Setan hi hun khat le mun khat chau a um thei ahi. Etsak na'n lamka aum leh shillong a umtheilo ahi, shillong a aum leh lamka tawh um kawp theilo ahi. Ahinla setan in suak ana semding tamtak anei ahi.

iv). Setan in a hung tung ding thil a mulaw k theilo ahi. Job in haksatna a thawkzaw nunga, tamtak a Pathian in malsawm ding ahi he leh, Pathianin a malsawm sanga tia nutsia ut zaw ding ahi.

v). Pathian phalnalo a Setan in Pathian chate sunawmna (attack) theilo ahi. Pathian phalna alakzaw nunga Job asugenthei pan ahi. Gingtute I tha muang ding ahi, Pathian lopipen ahi.

8. Job dinmun sanga tulai Gingtute dinmun phazo ah ding ihi.

Bible in tamtak kipete chung a tamtak kiphut intin, tawmcha kipete chu tawm kiphut ding ati ahi. Job tawm tak kipia ahi vang a Pathian a dingin a ginum ahi. A ban ban in

vak en hitiu:

i). Job in van lam a Pathian tawh Setan kihona bangma ahelo ahi. He masa hihen la hileh, ama leh ama ki sukhat dan le um in a. Ahin Pathian a dingin a ginum ahi a tawp tiang a. Tulai gingtute'n vang Job chanchin apat I zil thei uh ahi.

ii). Job hunlai a, Jesu khawvel a hung nailo ahi zia kin, ettawn ding a neilo ahi. Tulai Gingtute'n Jesu ettawn ding I nei uh ahi.

iii). Job hunlai a Bible um nailo ahi. Tulai gingtu te Bible piakin I um tau ahi.

iv). Job hunlai a Thagau Thiangtho piak in aumlo ahi. Pentecost tung nailo ahi zia kin. Tulai gingtute Panpitu, Thamuantu, Thagau Thiangtho piakin ium tau ahi.

Tamtak piak a umte, tamtak phut ding ahileh, tulai gingtute Pathian anga I tun phat uh le, jachat um talo ding ahi.

Thu tawp na:

Job hi Thuthung lui a mi, ahivangin amahi Thuthung thak in a hing ahi. Da um tak

mai in, Thuthung thak hun a, gingtu tamtak Thuthung lui lai gualin hinkhua mang aum ahi. Jesu Khrista thisan a tatdaw, Pathian chate hindan ding gual tak chu, Job Thuthung lui a um pa'n a sulang ahi. Pathian daw- idan, Khrista nungchang tak chu Job hinkhua'n le suklat in aum ahi.

Tichun, "Uz gam ah chun mi pakhat a um ah, a min chu Job ahi. Zia mipa chu dem- na bei leh mi diktat, Pathian lau leh thil phalo him him bawl ngailo mi ah'i'n. (Job 1:1). "Uz gam a mi" ati zia kin chu, mun chuam chuam a le Job kibatpi min dang um thei ahi. Zia te toh chiantak a hetkhen ahina dinga, "Uz gam a Job" a ti ahi. Gingtu suapi nangle Pathianin bangkim ahe suak kei ahi, nang le a hun hechian ma ma hi. Job guala aki suanpi/ aki at pi din- gin leh a min lopina dingin a hung lam et ahi.

Lalpa'n simtu te mal- sawm ta hen. Amen.

.....xXx.....

THAGAU THIANGTHO THILHITHEINA

Text: Nas. 2:1-4

~Evan.T.L.Mang Vaiphei

Thumasa:

Gingtute i vangphatnau chu Thagau thiangtho piak ah i um uhi ahi. La pianthak hun ah kipat khan Thagau thiangtho chenchilna (indwelling of the Holy spirit) chu la chang ngal ta ahi. Piangthak cha Thagau chenchilna changlo ti a um thei puai. Thuthunglui hun in a hi leh chu Thagau thiangtho in mite chenchil lo in thumtu in a pang zaw ahi. Jawlnei te bang, a hiloleh Pathian in nasep bik nei ding ah a guat/ a sawl te THUAMTU in a la pang sek a, a umpi den lo ahi. Tu thuthung thak hun ahi chu gingu mimal tin te ei chenchil ta ahi.

I. THAGAU THIANGTHO CHU KUA A HEM?

Thagau Thiangtho chu Pathian ah mi pathum te lak ah khat ahia, Pathian bukim chu ahi. Ama chu bangkim hia, bangkim bawl thei leh muntin ah um ahi.

II. THAGAU THIANGTHO CHU BANGTIK HUN AH PIAK I HIU EM?

Thagau thiangtho hi Jesu van ah a kalto zaw ni 50 ni ah gingu mimal tin te chenchiltu ding ah piak in i um tau ahi. Zia Thagau thiangtho chu piangthak cha te hinna luatu,

chekhiltu chu ahi. Nang uhi Pathian Thagau thiangtho chenna in la hui ti helo la hui em? (I Kor.3:16).

III. THAGAU THIANGTHO TUNNA DING AH PO- IMAW TE:

Pentikos ni ah Thagau thiangtho tunna ding ah po-
imaw i Bible in ei hil chu -

1.Thumatna: Ngak un ti ahi. Jesu'n a nungzui te chu Jerusale-
lem nusia lo ah Pathian thut-
iam Thagau Thiangtho chu
ngak ding in a hil ahi (Nas.1:4).

2. Kinepna nei: Pauchap zing
pum ah ngak ding ti ahi. Nung-

zui te leh numei khenkhat tawh Jesu nu Mari chu Jerusalem indan chungnung ah chun phatchuamngai tak in a pauchap uh ahi (Nas.1:14).

3. Kithutuakna: Nungzui te haw chu lungthim munkhat pu'n kithutuak tak in a um khawm uh ahi (Nas.2:1).

IV. THAGAU THIANGTHO HUNG TUN DAN (Nas.2:2,3)

Pentikos ni ah Thagau thiangtho tun dan chu zia gual hi ahi.

1. Thigua git hat tak tawbang: Zia hi hinna leh thilhitheina etsakna ahi. Thagau thiangtho chu gingtute hinna leh thilhitheina petu ahi.

2. Lei (tongue) gual in: Zia hin pauna leh thugenna a taklang ahi. Thagau thiangtho thilhitheina mang in i pau in thu i gen ding ahi.

3. Mei (fire) gual in: Mei hin hithianthona leh etchianna a etsak ahi. Gingtute chu Thagau thiangtho sukthiantho ah um in etchian i hui ahi.

V. THAGAU THIANGTHO TUNNA GA CHU (Nas.1:8)

Thagau thiangtho chu

umzia bei in a hung lo ahi. Thagau thiangtho chu gingtute

1. Thilhitheina i neina ding uh ahi: Thagau thiangtho i chung ua a hungtun phat leh thilhitheina i nei sek uh ahi. Gingtute thilhitheina chu Thagau thiangtho eima ah a tunna ah kinga ahi.

2. Hiatpitu hina ahi: Thagau thiangtho chenchilna chang ta chu mi piangthak te a hi. Piangthak ta te chu, muntin ah Khrista hepina chanchinpha hiltu leh hiatpitu hi ding ah mawpuakna nei te chu i hi tau.

3. Khrista chanchinpha puang ding ah ngansia ah um i hi tau: Gingtute chu Khawvel zosia chia ah nam tin, chi tin, pau tin te kiang ah chanchinpha gensawntu hi ding ah Lalpa'n ei guat te chu i hi tau ahi.

THAGAU LAM ZILLAI

Thagau thiangtho hi mawk chan thei ahi puai. Pathian thumatna, Pathian ah kinepna leh kithutuakna nei a poimaw hi. Tulai gingtute hi Pathian thumanglo, kihepituaana leh lungthim munkhat pu theilo, himaleh, Thagau ah

dim ah kikawi te i hiu. Pathian thu gual ah i hung hin phat leh ama Pathian ah kinepna i hun nei ua, zia kinepna mun khat neitute chu, Khista Jesu ah chun lungthim munkhat pu'n kal a suan khawm sek uh ahi.

Thutawpna:

Gingtute tuni hun ah nasep pha sem ding ah Thagau thiangtho chenchilna changtute i hinau hemil lo in, i hinau ah cheng Thagau thiangtho dawi lam hawl ah sempiting chiat ding in kisai tiu. Eimau hinna chiat ki-enchian leu hin, Thagau thiangtho chenna tak ding in, nek leh dawn, sil

leh chen umchan tawidan in i thiangtho zingnau em? ti hi dawtna poimaw tak ahi. Nang ah Thagau thiangtho cheng ahi ti zing ngal a, dumkhu, khaini, shajan, kuva, talab leh hinna subuak thei nek leh dawn ne zing la hi chun, la hinna cheng Thagau thiangtho chu a hatlo ding mawng ahi. Thiangtho Pathian ahi ngal a. A dawigual ah hing ding in kisa thak hitiu.

.....xXx.....

Damna Aw Phungvuktu Thak

Pathian mapuina zalin **Damna Aw** hi chiazal thei ding in a um a, ei puitu Pathian chu lopina changta hen. Tuchung ahin suklat thei ding in **Phungvuktu Thak** a um a, amau chu:

- i). Pi. Kimtoi of Kohima - **Patron Member**
- ii). Pu. Khamsawngolian of Kohima - **Encouraging Member**

Phungvuktute zalin **Damna Aw** hi subscriber zosian man tawmcha ilakthei uh ahin a chung un ikipakna asang mama hi.

Lalpan tam takin malzawl ta hen!

Editor-

THAGAU AH DIMNA

~Upa L.T. Khupa, HQ Tuibuang

“A leng un Thagau Thiangtho in a hung dim tau a, Thagau in a pausak dungzui in pau dangte’n a hung pau tau ahi.” (Nas.2:4).

Sawlchak Peter in, Lunggil hetu Pathian in ei uh ei piak gual bawk hin, thagau thiangtho a kiang ua le pian a chung ua a kipak hi ti ahiatsak a. Tichun amau leh ei uh khen chuam neilo in ginnan a lunggil uh a sukthian piak a. Zia thu ahin thil paw-imaw tak pani a gen lang ah - (i) Pentikos ni sawlchakte chung a Thagau ah dimna hungtung chu Kornelia leh a inkuante chung in le ahungtung a, (ii) Thagau thiangtho hung tung chu ginna ah a thinlung uh hi thiangthotu ahi.

Zia thu ahin thagau a baptisma chan chu soal hithi-anna ahi ti i hia’u a. Lam chuam ah thagau ah dim chu hi thianthona ahi. Thagau leh hinna thunun thei thil pani a um a, taksa leh thagau chu, zia thil panite hi thil kilemlo tak ahiu a. Mihing a pakhat a dim leh pakhat chu pawt ding ahia. Thagau chu sunglam nun a mawpuakna latu ahi. Abul apat a tawp tiang a ama nasep ahi.

Pathian thu chun kuale Khrista thagau neilo chuh ama mi ahi puai atia(Rom

8:9). Kuanle Khrista anei chun Khrista thagau chu anei ahi. Zia taka Khrista thagau ti hih Thagau Thiangtho ti tawh kibang ahia. Khrista chuh a thasang in Thagau Thiangtho in ei uh lak in a cheng hi. Ziakachun Khrista neitu ti leh thagau neitu ti hi a kibang ahi. Khrista chuh ei uh lakin athasang Thagau Thiangtho in a cheng a. Ziakachun pi-angthaktate chun Thagau Thiangtho a nei ahi ti hi i pawm dan di’u ahi. Thagau thiangtho zilsaka umna mai hilo in ama thagau ngei chu a chang ua. Zia

thutak hih ngaikhawk mama a ngai hi.

Gingtu pianthakna chu a tak tak ahi chun, Thagau Thi-angtho chuh a chung in atung ngei ngei hi. Chun Thagau Thi-angtho chan leh Thagau a dim chu thil chuam chuam ahi tile hiat a ngai hi. Pentekos ni ma-sang khan thagau chu gingtute kianga piak ahi ta Khrista'n a chung ua hat in thagau thi-angtho nei un tin a pia. Pentis-kos ni thiltung ahi leh vang a danglamna ziak a lopi mama hi. Thilsiam thak danglam tak ahung hi tan ahi. Khrista lalna chungchang in ngaidan diklote chu hibei ahung hita. Khawvel mi hina apat thagau mi hina ah ahung danglamzo tau ahi. Tak ahin chuh khawvel ah lalna ahi puai ti ahun hetau ahi.

A pilnateu chu Pathian batna ah tui in achup mang(-tum) gual in a um ua. A hin-nate'u chu Pathian phatchuam ngaina ah hihat in a um ua. A lei un Pathian thu gil mak tak tak a puang dawk ua. Amau vamutute chun bang ti dan ahi tam? ti in maksa mama in, um-

dan ding le ahetheilo khawp in a um uh ahi.

Sawlchak Paul chun Ephesi khua azilsakte amu ah a thudawt masapen chu, la gin til lai ua khan Thagau Thiangtho la chang awm? ti hi ahia. Gingtu thak Saul kiang inle, Anania'n, Thagau Thi-angtho ah la dim theina ding in la hungna lampi'n Jesu khan ei sawl ahi atia. Nidang lai a ahi gual un, gingthakte chu thagau a dim nun nei dingin kaihuai lehing akuldan kichiantak in hiatsak lehin, tichun nung-tawl na leh masawn chuamlo nun hi pumpel in um thei ina.

Tulai Khristiante hi khawvel lungthim pu'u nung-tawl in ginlana tawh launa in a um ua, sawlchakte nasep sim-tute chun tulai gingtute sângin zia hunlai a Khristiante khan thagau a dimna a chang nasa zaw deu ui ti hi hechian ngei inau. Tulai hin vang Pathian malsawmna, thagau a dim hi a chang tawm cha bep a um tau ahi.

Tulai a gingtute hin bang ziaka thagau a dimna

hi i chanlo uh? Pathian thil hitheina chu Pentekos ni a khah beiziang atam le? Hilo e! A kitiamna kha nang uh a ding, la chateu a ding leh gam la taka um zosia a ding leh Lalpa Pathian in a kianga ako zosiate a ding le ahi, (SN 2:39). Thagau a dimna chu gingu zosiate a dingin eima a ding chiat a khâm(reserve) theina inei ua. Pauchapna'n dawi gual takin i dawn di'u ahi. Nei le nei ngei dingin i kisazo ding ahi.

Sawlchak Johan thuzik hi chian deu in vak sim hitiu. Bung thumna nun bul thu gen in pianthak thu a genna. Bung li na'n hinna tuinak thu agen kit a. Bung sagi ah chun a pum apat a hinna tuinak thu agen kit a. Tuinak mai hitalo in, lui(i(river) thu agen kit ahi. Lui pakhat bep hitalo in tuihing luite ati ahi. Pathian thil phal zia chu a nasana lawm lawm e..!

Thagau a dimna chu khawvel a thil mu haksap-en gual in a gen maithei ua. Chun zia gual ding a chun i ki guanggal tawklo uh le ahi mai

thei. Nu'n a cha damlo kiang in damdawi piak a thatnawp mama sanga nasa zaw diak in Pathian chun gingu zosia kiangin Thagau Thiangtho chu piak a nuam zaw mama ei vei. Nang uh migilote'n bawn la chateu thilpha piakna châng la hiat uh leh, la pa'u van ah mi chun a dawntute chu Thagau Thiangtho pe mama in'a.

Thagau Thiangtho piak tâklo leh hi dimna dawng theilo ding a i kingai chun Pathian i gingu pua'n, eima le i ki kawiniam talua ahi. Pathian chate ihu a, malsawmna lûl pen chang ding ah a hepi leh a dawisak mamate i hui ti hiat a pha chuam mama ahi.

Lalpan a thu malzawlta hen!

.....xXx.....

GINGTU HINKHUA AH HAKSATNA

(Vaihawmte13:1-10).

~Rev. Siana Phaltual

Khawvel ah mihingte hin piandan leh khandan chuam chiat a kinei a, khenkhatte chu mihausa leh Insung nuam tak ah pat hung seilian a lawi leh pai pha hau ma ma a, gentheina leh châtgatna hinkhua chu banggual ahi em ti hephalo a kium hi. Mi khenkhatte chu Insung haksa tak ah pat hung khawsato ah nisin a pawimawteu kilaw kawm kawmah kitodel a kium kit ahi. Ziate ni tilo ah hin mi khenkhatte chu simmawna leh chuam bawlana bep hung tuakto ah, a tui tui leh a hawi leh pha zosia chu changphalo ah hinkhua hung mangto le a kium kit ahi. Ziagual ah chun Jephthah hile nuthak cha ahijiak in a suapite munawplo in a um a, kum 18 hil hial a Insung ah pat nawdaw in a um hi.

Jephthah hi a chanchin tamtakte'n ihiat mamau hid-ing in gingchâk a um hi. A galhat dan leh hangsan dan, melmate laka kipat a chipite ahukdaw dan leh Pathian kian-gah a kitiamna gual ah a chanu kithawina dinga lântu ahi thu lam deu ngen chu i hetzing uh himaithei ahi.

Jephthah hi Gilead thaikêm chate laka khat ahi. Gilead hin ji masa ala nei a, a ji masa chate chun Jephthah chu apa'u gothilte chu a penuam ta puau a, Insung ah pat chun a nawdawk tau ahi. Tichun, Jephthah chu Top gam lam in

a vachengtai.

Zia hun lai ahin Israel chate chu Pathian ah kipat in ala nungtawl tau ah, Aram mite pathiante; Baalte leh Astartes, chuleh Sidonte pathiante, Moabte pathiante Ammonte pathiante leh Philistiantepathian haw chu a ho san tau ahi. Tichun Pathian chu a lungna ma ma ta'n Philistiantepathian Ammonte khut in a peta ahi.

Pathian in Israelte chu namdangte khut ah a piakdaw ahitâk ziakin Philistiantepathian Ammon mite chun Israelte chu avado tau a, Lalpa a Pathian uh kihei mangsan ah pathian

dangte ho san ahitâk ziak un Pathian in kum 18 sung ving veng chu namdangte khutnuai in gentheina chu a thawksak ta ahi. Himaleh, Israelte chun Lalpa a Pathian uh chu kokit in leh a kiang ua um zing pathian dangte chu paidawkin, Lalpa a Pathian kiang ah chun thupha a chawi kit tau ahi. Tichun, Lalpa Pathian chun A mite gentheina chu enzo diaklo in hâtna thak a hung pekit tai.

Zia hunlai ah hin Ammon mite chun Israelte chu do ding in galvan ah kivan in Gilead mun in a hung kikul tau a, Israelte chule Ammon mite do ding in Mizpah in a kikul tau. Himaleh puitu ding umlo ahiziakun Israelte chu puitu pawimaw in a kihokhawm tau ahi. Atawp in Top gam ah a nawdaw pa'u Jephthah kiang in a vachiau a, puitu ding in a vako tau ahi. Israelte beidawnna chu Jephthah a ding in lemchang takmai ah phuba laktheina hun ahi. Chuleh, a dinmun hi Pathian gensiat ah nutsia theina mun le ahi. Himaleh, Pathian ah kingazaw'n Israel puitute chialna chu ala pawm piak tai.

Jephthah hin a pa In ah

pat deldawktu, achipite dawtna hi ala nial hihenla, phuba lakna'n la mangta le Vaihawmte lekhabu ahin Israelte puitute lak in a min chuang kha puantin, ginna ah galhat Samuel leh Davidte gual in Hebrai lekthawt ah hin le a min kilanglo ding ahi (Heb.11:32).

Haksatna, buaina leh lungkhamna haw hi mizosian nisin ah i tuak zing uh leh i thawk zing uh chu ahi. Zia khellam ah chun Pathian in a mite, a daw leh matchak nawpte chu haksatna hi A ma ah ginna sangtak mai leh Ama ah muanna a neizawk diakna ding un a tuaksak tei sek hi. Pathian mi matchak chuam chuamte; thugen lam ah amatte, sukdamna lam ah amatchakte, thilpiak lam ah amatchakte leh kochuam etkawlina lam ah a mimatte hi kuama haksatna tuak masalo ah, achungua mawpuakna nawptak mai ah zo a umlo ahi.

Gingtu khat hina ziak ah hin hatsatna hi munchuam leh midangte hetkhaklo ah kipat hung pawt khello mai thei ahi. I insung mite leh i lawi leh pai suan mamate laka kipat leh hatsatna hung pawtthei ahi.

Ziagualachun, Jephthah hin le buaina leh hatsatna chu mi-dangte a kipat in a tuak pua, ama insung mite, ngei ngei ah kipat ahijawi. Ahinla, ama insung mite ah kipat buaina a tuak lai inle a chi leh nam mite leh a insung mite panpi theina hun a neilai in Pathian muang in thadalo hial in asem ahi. Tichun, ginna ah galhatte lakin tuni tiang ahin simkhawm ahijing tai.

Gingtute hin le haksatna ituak hun ah le Pathian hejing ah thilpha ibawl jel hi Pathian chate leh Ama muang mite chun i sep ding him uh ahi. Thilpha bawl theina hunpha Lalpa'n ei piak hun ah hin phuba lakna hun ah i matlo hial ding ahi. Taksa gam ah hin vâng thangtawm theina leh lungawilona ding tamtak um thei in a, ahiziakin taksa gam leh thagau gam chu a kibang ngai ngailo ahi. Alangkhat lam in, khawvel hinkhua ah haksatna haw hile Pathian in Ama i nai zawk theina dinga le a si-amthei ahi.

Bible chun, *“Zia-ziakchun, a hun tak ah a hun chawihawi theina ding in, Pathian khut hat tak nuai in*

kikawi niam un.” ati ahi. Mihing kibanglo ihiziak un haksatna ituakte chule kibanglo ding ahi. Haksatna him him chu a nuam a um diak pua, ituak taphawt chu ikhamtawk un haksa isachiat sek uh ahi. Jephthah a ding ahin le haksatna athawkte haw hi nawp diaklo ding ahi. Ahinla, Lalpa a gin ziakin Lalpa Pathian chun Israel khangthu ah mangtalo ding in vaihawmtu in a siam mai ahi. Banggual dinmun haksa in ding maleu hinl Lalpa muang in Ama kiangin kikawiniam phawt leuhin Lalpan ei dawmsang ngei ding ahi.

Awle unau! mihing kibanglo ihiziakin haksatna leh beidawmna ituakte kibanglo ding ahi. Gingu hina zia-ka i thawk dinga le kilawmlo i thawkna le um ngei in a, zia lawm lawm hivang ti a Pathian chungah ale i phunnawi nawp hun le um sek in a. Himaleh Lalpa Pathian ah chun bangkim in kinga zing in Ama ngakzo phawt leuhin Lalpan ei taisanlo ding ahi. *“Lalpa chun, “Hun thâtham pua'ng ka tin, hun nusia ngai pua'ng ka,”*(Heb.13:5) ati ngal a.

.....xXx.....

Presbyterian Kochuam Kivaipuak Dan (Church Administration)

~Rev. S.T. Kaia Vaiphei

Thumapui:

Presbyterian kochuam mi leh sakum sawttak hita leh-ing le mi nautang a ding in I Presbyterian kochuam chia dan; kivaipuak dan hiatlo tamtak a um thei a, zil ding leh a tak ah I mat thei nailo tampi um nalai ding ahi. Pawimaw ka sak diak te ka hun taklang hi. Presbyterianism ti hin a huaplana, Constitution ah umte chu sim ah hiat ziang ding leh mat ziang ding ahia,- ka hun taklat te hi constitution a le lang bek lo, himaleh Presbyterian kochuam in I bawldan, chia dan hi tho (unwritten, practices and traditions) te sui bik ding i hui. A pawimaw tamtak um lehle ka lung ah hung kilang lang ka hun zik khawm ziang ahi.

1. Church Court:

Presbyterian kochuam kivaipuakna ahin Church Court ti chu kochuam vaihawmna sawng um to chu zia gual hi ahi. i) Tualsung kochuam ii) District (bial) iii) Presbytery iv) Synod v) Regional Assembly leh vi) General Assembly ahi. Kochuam in thubuai a nei a, a ngaitua fel thei lo chun vaihawmna sang zaw ah tut ding ahi.

2. Committee lamkai dan:

Kochuam ahin chairman, secretary leh panmun

dang chuam chuam tuk a um a, maleh kochuam neitu pen chu a thisan ah chawpa Lal Jesu chu ahi. Kochuam ah lianpen, lamkai pen chu a kochuam neipa Lal Jesu ahia, vaihawmna a chun ama dawidan ahi na diam ti gel khawk pen ding ahi. Presbyterian kochuam ahin mimal thuneina a um puai. Mipi dawidan ah vaihawmna ahiziak in a chairman/moderatorchun a tamzaw dawidan ah thu a tan ding tina ahi.

3. Biakna kikhawpna lam ah:

Lamkaite chukochuam

Pathian biakna kikhawpna a thei lai sia a kikhawp zing ding uh ahia, hun a mat dik ua, a taimat ding uh ahi. Kikhawpna leh Committee na mi ettawn ding ah a masapen ahi sek ding uh ahi. Tulai khawvel ah thil buai um tak khat chu individualism ahi. ‘Ka buai hi, ka kiman puai,’ ti suanlam ding insung leh khawtang ah a tam nuam ma ma a, mi buai theilote chu Pathian in le matna ding a he diak puai. Mifel mi buai theite chu Pathian in a mang nuam a, Bible ah le Pathian mi kote hi sep ding helo ah mawk um te ahi puau a, nasem buailaite hi a mang nuam sek ahi. Pathian sang in eima i kikawi sang zaw sek a, buai lo tak leh bep Pathian nasep ding i gaw sek ui.

4. Thilpiak chungchang ah: Pathian ah sawmakhat i piak uh hi eimau a Pathian pia i hi puau a, ama a, ama a neitu i piak uh ahi. I piak lo chun i chu piak uh ahi. Sawmakhat i piak uh hi Pastorte semtute pia i hi puau a, Pathian chu ama a i piak uh ahi. Thilpiak leh sep leh bawl ah mite ettawn tak

i hi ding uh ahi. Pathian ah thilpiak hi malzawl na dawn na ahia, Bank account interest pung pen sang ah le pung zaw ahi. “Pe ta un ti chu piak in um in lau, thilpiak in Pathian chu khum zo puan lau, Pathian in mihing lei a ba ngai pua, malzawl na nak ahi ngal a,” ti ahi. Pathian thilpiak pete chu a pung deu deu ua, a pelote chu a kiam deu deu sek uh ahi. La phuaktunchun a hechian a, ‘I kiam punnan I ngai’ a ti ahi.

Envelope ah Pathian gam leh tualsung khendan ding in eima mimal thuneina Presbytery in ei pia, maleh a tangpi in Pathian gam 70% leh Tualsung 30% ah khen a pha pen hi. A ziak chu Pathian gam 70% i kawilak in 20% chu M & E ding ah office lam ten a khen sawn kit uh ahi. Chun anchangham hi pastoral fund ahia, numeiten dawl maleu a thunei ding chu local committee ahia, local kiang ah a hun piaklut ua, local ten Pathian gam leh thawlawm dang dang tawh office ah a submit khawm sek ding uh ahi.

5. Committee chia dan:

Presbyterian kochuam hi khawmpi vaihawm sek kochuam ahi. Khawmpi tak leh a kum sung ah a nasepnateu Report pia in, chun kumthak ah sep ding zosia guanggal sa kawi ahi sek a, zia sep dawna ding a chun sum lut ding zat chu matna ding budget in a kikawi sek hi. Zia te chu sep daw mualsua ahi masang in nathak a kila ngai pua, sum senna ding le a budget ah a pan lo chun bawl lo mai sek ahia, a pawimaw chun a kumkit tak leh budget ah kawi in bawl mai sek ahi. Khawmpi thupuknate sep daw ahi theina ding leh khawmpi kikal ah thu pawimaw kingang, a lo theilo a um chun bawzui ding in Standing Committee guat ahi. Ziagualmachun department dang dangten le kumthak sung ah a nasepnau khawmpi ah report pia in kumthak ah a sep ding dan uh guanggalna siam in zia chu sep pitinna ding in budget a kisiam a, khawmpi in pawm piak ahi chun zia haw chu sep pitin ding dan chu amau com-

mittee chun a bawzui uh ahi. Banghem ti ah khawmpina guanggalna panglo sep ding a um thut chun standing phalna a lak ding ahi. Standing in a phal lo chun bawl lo mai ding ahi. Chun Presbyterian kochuam a hin joint Committee a um puai.

6. Khawmpi leh Committee chungchang:

Presbyterian kochuam hi mimal thuneina Episcopal ti chu Bishop nei Roman Catholic te leh tualsung kochuam thuneina Congregational kochuamte gual I hi puau a, mipi tel leh Ordained ten a pun ah mipi dawidan ah vai a hawmnau kochuam ahi. Khawmpi mangcha vaihawm sek, zia ding a chun Presbyterian (Pastor/Upa) leh guat bikte panna, puitu kisang sek kochuam ahi.

a) Tualsung leh Bial a hin puitu pen chu Chairman a kitia, Presbytery a pat a chunglam a chun Moderator a kitii. Amau hi dan pangai in kumkhat khat a pang sek uh ahi. Ziate hi a lemchang lo a um uh chun a nai pen ah a la tu khasaten

a thasan sek ui. Himaleh tu-alsung ah Bialtu pastor umna a chun ama chu a chairman a hi mai a, bialtu pastor chu a bial sung ah a umna taphawt ah hotu chan a chang sek hi. Bial chaiman chu vang pastor ahi tei tei ding tina a um chuam pua, I nawp chun midang le guat thei tho ahi.

b) Bial level ah Committee him him hi bialtu pastor hiatpina kosek ding ahi. Committee ah chun a pan a, thupuknate chu a hiatpi tei ding ahi. Zia chu dan thil ah chiakhiallona ding ahia, maleh bialtu chun committee chu ama thu bep ah a pui kit chun a pha diak puai. Tualsung hihen la khawmpina hitaleh hun changtuten amau nawp thu in a chanvo uh midang a piak thei uh ahi puai. Local Committee / Bial Nomination Committee haw theng ah san ding ahi.

c) Presbyterian kochuam hi mipi dawidan ah vaihawm (democracy) himaleh constitutional ahiziak in Constitution (Dan) kal ah vote lak ngai ahi puai. A umzia chu Consti-

tution kal in a tamzaw kithugual ziang maleu dan dungzui ah pang mi pakhat bep chun le a zaw ding tina ahi. Presbyterian kochuam ah hin mimal in thuneina/hotu chan sawttak a tu ngai pua, mimal sang in Committee a thunei pen ahi.

7. Kikhawpna Dan:

Kikhawpna hi phatacha guatlawk masak ding ahia, eimau Presbyterian kochuam hi kulmut I kisakten vang un worship order (liturgy) zuite I hilo ziak un kochuam dangten free worship ei tiu a, I kikhawp dan tangpi chu la sak, Pathian ho ding ah chialna (Call to worship), Programme puandawna, hun hawn pauchapna, Thupuanna, la sak = Special no/choir, thawlawm dawlna leh latna, thugenna, mipi la sakna, Lalpa pauchap/benediction ahi. A tangpi in Lalpa Pauchap hi kochuam kikhawpna pangai ah genkhawm ahi sek a, hunbik ahiloleh khawmpi vel tak leh benediction ah hunkhak ahi sek hi. Benediction hi a form gual chet a gen a pha, zia chu I zui thei chet lo

leh le Trinity chu a kim tei ding ahi. Chun pauchapna pangai le Jesu kiang ah dawn/pauchap a um sek a, zia hi doctrine kha-wi kha ahiziak in chit thei ding ahi.

8. Pau mat dan chungchang:

Pau mat dan chungchang ah chit thei a ngai a, kipatna ding ah la sak ding ahi pua, thugentu kona ding ah la sak ding ahi pua, hunkhakna ding ah la sak ding ahi pua, Pathian chawihawina/pakna ahi vek ding ahi. Bible chang hung sim ing ka / sim hi tiu, ti sang in Pathian thu munkhat a zik, a bung, a chang kichian tak ah gen sek ding ahi. Pauchapna 'la thawkitni thiangtho' ti hi a dik puai.

9. La tel chungchang:

Thugentu in la a tel ziang ding ahi pua, la dawi/tel a nei chunsak phalna chairman kiang ah a lak ding ahi. Thawlawm lan ding in thawlawm lat sung in mipi dinsak ziang ding ahi pua, chaiman in din ding a ti lo chun dinsak lo mai ding ahi.

10. Kikhawpna hun guat leh

kithasan chungchang:

Kikhawpna chun Chairman chu a hotu pen ahia, himaleh a dan tak a chun a man mi a nawp nawp a guat ziang thei ahi pua, Local Committee in thakhat sung/kaalkhat sung a ding bek a guatlawk sek ding ahi. Ahi dan tak a chun zia mi kiguatpa chu ahithei lo ahichun a man mi a nawp nawp a thasang ding ah a kiguat sawn ziang ding ahi pua, chaiman in le a nawp nawp a la guat ziang ding hidiak lo in local Committee in approval a bawl sek ding ahi. Zia chu Pathian thu ah kiziltina diklo, thulak dan diklo leh hun chang kha nailo tamtak um lai ah dawisak deute a vel vel kiguat ziang venna ding ahi.

11. Pulpit leh maicham:

Presbyterian koch-uam Biakin a chun Pulpit hi a nungram pen ah kawi sek ahi. Zia masang a chun Maicham dawkan (Table) a um a, dan pangai a chun Pulpit leh Maicham dawkan kikaal a chun chairman leh secretary a chut sek ding ahi. Presbyterian ko-

chuam a chun Pulpit leh maicham dawkan hi ngai pawimaw ahia, nawp dan dan ah chawn ngai ahi puai. Zia mun chu mun thiangtho ah kawichuam ahiziak in puitute/thiampute Pathian represent ah ngaite tilo chun a kinung ngat ngai puai. I Presbyterian kochuam chanpiten la pawl a chutmun ua pat a hung sak ziang seknau ziak lianpen chu chutna leh pawt lemchan leh lemchanlo lam sang in mihing sang ah maicham lam ngat a ngai thupi zawk ziak uh ahi. Chun Maicham side langtua a chun lectern a um a, zia chu thupuanna mun leh hun pantu dinna mun ahia, kikhawpna pangai a chun zia mun a chun thawlawm le lat ziang sek ahi. Khawmpi leh nibik a chun vang thawlawm hi pulpit chung a pat lat sek ahi.

12. Subject nei:

Kua zosia a diak in puitu lamte, Upa lamten I tak-sap pen uh chu thupi nei ah thugen hi ahi. Mipi masang ah I dindaw tak leh bang ding ah ding dawk ka hem? Ka subject

ding bang ahi em? Ka gen ding bang ahi em? Bang gen ding ah ei guat uh ahem ti kichian tak ah kihiat ding ahi. Hun kawt hawng ding gen ding dawl a um a, thawlawm lan ding gen ding dawl a um a, min kipak thu gen ding ah ei guat ah I subject gen kha lo in dang dal man ah I subject tawh kituaklo gamtin gen ziang ding ahi puai.

13. Kichenna:

Kichenna chungchang zosia genseng lo ding I hia, I hiat lo ah khawk te bep gen hi tiu. A masapen in kicheng dingte kum chu pawsal – 21yrs, Numei – 18 bek ahi tei ding ahi. Kum tinglote chu pastor in gawplo mai ding ahi. Maleh pawsal lam leh numei lamte a kihothei ua, mo neilamten kochuam Committee kiang ah kichenna siam piak ding ah a dawl ua, kochuam in a lemtpi chun kochuam Committee chung ah mawpuakna ngat ah pastor in gawp ding bep ahi. Kichenna hun (timing) hi phalna bik a umlo chun Dan hi hen la Pindan hitaleh zinglam

dak -7.00 – 7.00 pm. kikal sung ah ahi tei ding ahi. Pindan ah kicheng dingte chu kikhutsu-ina I bawl masang in thununna piak tei ding ahi. Thununna piak nailo chu a kikhutsui thei puai. Kochuam dan ah kichenna hi le kikhawpna, Pathian biakna chi khat ahi tho ziak in biakin sung ah monu a insung miten a hung thaklut uh a ngai pua, mopate tawh a hung kitawnlut khel le uh a ngai diak pua, a hung lut tak ua leh mipi din le a ngai diak puai. A chutna gel ding uh a hung kilua ziang ding uh ahi.

Kichenna hin khutsebi hi pawsal in numei a bu sak ding ahia, numei in le pawsal bu sak a ngai diak puai. Dan ah kichenna ding ah In nite leh kochuamte bawlkhial mun pen sek chu Pastor dawng lo ah hun a hun guat ziang sek uh hi ahi. Dan lo ah kichengte kochuam thununna chu thaguk sung a tin tei ding ahi.

14. Sacrament:

Lalpa Zan an hiphtakcha kochuam upate ngei in a guanggal ding uh ahi. Chun

Sacrament no sawphtian na chu le chawkidarte ngansia ziang ding ahi pua, nekbang, dawn bang le kitup tak ah paiman/sukmangthai sek ding ahi. Kochuam thunun ah umte leh dan zokim nailoten Lalpa zan an a um ngai puau.

15. Baptisma chungchang:

Presbyterian kochuam hi naupang baptisma pawm kochuam I hia, Nausen tilo chu baptisma chang chiat ding ah ngai I hiu. Baptisma chu biakin ah bawl tei ding ahia, naupang chu Baptisma chansak lai in a nuleh paten a dinpi ngei ding uh ahia, nu leh pa neilote chu a sungkuan kinai-pi ah mawpuakna la dingten a dinpi ngei ding uh ahi. Baptisma changlo chu i constitution in member dang a ti ahi. Baptisma hi khristian hina leh a baptiama channa kochuam mi hina ahi.

16. Pem upa:

Pem upa chu a pemnau kochuam a chun member himaleh a pemnau kochuam a chun tel thak kit ahilo uh chun a upa hinau chu sawm thei lo

ahi. Sacrament (Lalpa Zan an) guanggalna hin tualsung kikhawpna pangai a chun pem upate guatlo ding ahi. Chun dawkan ah upkhawmna in le a pang ngai puau. Chun pem upa hi tualsung Local Committee member ahi ngai puai. Committee bak dang in vang local committee hiatpina/lemtina in mat thei ahi.

17. Thugentu gawi:

Thugentu vakvel hi Bi-altu pastor hiatlo ah gawi ngai ahi pua, chun kochuam committee a kilunggual lo chun gawilo mai a pha pen hi. Kochuam tamtak buaina hi thugentu gawi ah chit thei lo ziak leh eima kochuam sung mi ngei le a Pathian thulak dan chuam, lak dan diklo gawi tam takluat ziak ahi nuam sek hi.

18. Kochuam Upa thina chungchang:

Pastor leh Upate a thi un biakin ah puaklut ngei ding ahia, khawmpi a le sunna nei sek ahi. Pastor thite chu General Assembly khawmpina le sunna nei sek ahi. Pastorte leh Upate thina programme

siam chu Presbytery chanvo ah ngai himaleh presbytery dawng chung in tualsung in Presbytery thasik in a la siam mai sek a, programme neitu vang Presbytery ahi zawi ti hiat a phai.

19. Zan zokim laklutna:

Kochuam tin ten Sunday school kitup tak ah bawl a, naupang chu kum 4 a tin tak leh Beginner ah lut panning ahi. Tichun amau mimal kum -14 a hung tin tak ua leh Sacrament pawl a zawu a, dan zokim ah laklutna siam ding ahi. Zia dan zokim ah laklutna chukumsin leh kumtawp ahiloleh kumthak lim a nei tei sek ding ahi. Zia laklutna ding a chun pastor a lemchan lo leh le local chairman ahiloleh upate lak ah guat bik khat in a bawl mai sek ding ahi. Zia chu bawlo ziak ah khanglai tamtak Lalpa zan an nek leh neklo ding ah buai, bangti nek ding pauchapna bang gen ding helo tamtak a um sek ui.

20. Local Secretary thupuan:

Presbyterian kochuam chiadan in Biakin kikhawpna

thupuangtu ding chu Local Secretary ahia, a thupuan ding chu kochuam Committee thupukna mipi hiat ding ah pawimawte leh kochuam in lekha a dawn puan ding ah pawimawte bep hi ding ahi. Local chairman in thu a puang ngai puai. Kochuam khenkhat ah chun numei lam leh khanglai lam ten le local secretary a puan sak mai sek ui.

21. Trinity kimatna:

Trinity kimatna hi a tangpi in Baptisma leh Kichen-na hi ahi deu pen hi. A dang sia in vang “Kochuamte luchang pen Lalpa Jesu min in”ti mat ahi deu vek hi.

22. Sacrament leh kichen ni chairman chungchang:

I kochuam chiadan in Sacrament hun leh kichenna in midang chairman ahi ngai puai, Pastor in a leng ah a lak vek ziang ding ahia, a nawp chun hun hawn pauchapna, malzawlina dawtpiakna leh benediction midang a pethei hi.

23. Thunun ah umte:

Kochuam sung ah

thunun ah umte chu kochuam member tho ahiu a, siat leh phatni in le kochuam dan gual tak ah a chung ua na kistem tho ahi. Thunun ah umte chu kochuam te thasik ah bangma guat ngai ahi puau a, dak khen, khuang khen, la chaang gen, la sa leh hun hawn pauchapnan a kiguat ngai puai.

24. Thidak khet chungchang:

Mi ama leh ama kithatte chu kochuam thi dak a kikhen ngai puai, kochuam in Programme a kisiam ngai puai, Pastor ahiloleh a vuitu ding upa ti dan dan in kochuam chun a zui mai ding ahi. Maleh kochuamten phatak ah uap ding ahi. Presbyterian chiadan a chun nausen lamzui ah kivuite leh Baptisma changnailote le zia dan hin a huap ahi. Kochuam ah thunun hi lai te a thi tak ua leh vang kochuam in dak khet a, programme le phatak ah guanggal tho ding ahi. Amau kivui dan ding chu dan sung ah um lai te tawh a kikiakna bangma um lo ding ahi.

.....xXx.....

PYF KHAWMPI REPORT

Chawmkim

Central Khristaian Khanglai Pawl khangthu a dinga a masapen dingin MPYF min in Tuithanak District Choir in PYF 23rd Biennial Conference, Mawkhar Presbyterian Church, Christian Endeavour Union, JSKJP Synod Sepngi, Meghalaya ah date 3-5 May, 2019 sungin “ Arise and Shine” Isaiah 60:1. ti thupimang PYF Khawmpi chu aki uap thei hi.

PYF Conference uap dinga MPYF member chiakhawmte :

Tuithanak Dist. Choir member :

1. Pu Donglal 2. Tv. Sonmuan 3. Pu Mangminthang, 4. Tv. Paukhanmang 5. Tv. Nanglemsiam 6. Nk. LamPianti, 7. Nk.C. Kimboi, 8. Nk. Tinglalkim, 9. Tv. Khomlun 10. Tv. Kapbawi, 11. Tv. Lalmung, 12. Nk. Hoithiannei, 13. Nk. Mimi, 14. Nk. Naukim 15. Tv. Thanglallian, 16. Pu Tonglal, 17. Pauzimlian, 18. Tv. Chuanginlian, 19. Nk. Tracy, 20. Nk. Tinghoilal, 21. Nk. Kimte, 22. Nk. Lhingsamkim, 23. Nk. Rody

CKKP min ah uapute :

24. Pu PD Minlal, 25. Tv.

Chinlunthang, 26. Tv. Felix Muansang

MPYF min ah uapute :

27. Tv. Zothanga (TP) 28. Nk. Phalneidim (EMP) 29. Nk. Hatneimoi (EMP) 30. Pu Ginthiansiam

PYF member :

31. Upa Lalzuitluanga (TP)

32. Rev. D. Robert Thanga

Presbyterian Youth Fellowship Committee in PYF Conference ah Pathian chawihawina lâ pani sa dinga MPYF a aguatna tawh kidungjui in MPYF Committee chun CKKP ngansiana a hun pia, CKKP min in Tuithanak District Choir chun Pathian chawihawina lâ pani (English lâ pakhat leh Vaiphei lâ pakhat) kilawm takin a lemdawk thei ui. Zia

Khawmpi uap ah chia theina dinga chun sum leh pai tam-tak pawimaw ahiziakin, CKKP Committee chun sum leh pai ah taksapna liantak akinei ziakin Khawmpi uap ah chia ding choir memberte kiangin kithuapina. ₹ 1000/- leh uaptu memberte apat in ₹ 1500/- chiat dawtna bawl ahi. Chuleh zia sum leh pai ki dawldawk chu kidai zolo ding ahiziakin I Kochuam nu-leh-pate kiangah I mamaw uh chu dawn mai hitiu tiin, KSP Standing Committee ah ₹ 60,000/- (Sixty Thousand) dawtna akibawl dungzui in Standing Committee chun chate beidawng taka um chu en zolo in CKKP in MPYF min ah PYF Conference a uap theina ding ahi phawtleh tiin sum leh pai kidawn chu ei phalpiak ziakun CKKP in Kochuam Nu-leh-Pate kiangin zia “Damna Aw” hi mangcha’n kipak thu i gen ui. Chuleh kinep phaklo hial in, Shillong KKP in MPYF min ah PYF Conference uap ah chiate zosia Thingpi tuilum ei dawn-pina chungun Pathian min in a

chungun CKKP sikin kipakthu i gen bawk ui. Lalpa’n Shillong Kochuam leh KKP maban ah le pan la zel thei dingin la ma’u hun pui in hun malzawl zing taken tiin ka dawisakna ka hun lan hi.

PYF Conference ahin choir member leh delegate mi 569 giaklut in kkikhawpna hun nuamtakin mat ahi sek hi. Khawmpi ah giaklut ah, ki register hi mi tamlo maleh kikhawpna hun ahin a tangpi’n mi 1500 vel apha sek hi. Zia Khawmpi hun sunga hin Synod tin Choir apat in Pathian Chawihawina lâ ngaithak ahi ban in Pathian thugent’u thu mantam tak tak a hun gente’u chu khawmpi chiaten a lawkpi kinep a um hi.

2019-2021 sunga PYF Office Bearers leh MPYF member dinga ki guatte:

Leader : Rev. Lalramthuara, Biateram Synod
 Asst. Leader : Rev. Jubileethanga, CHT
 Secretary : Rev. Precious-tar Tmung, Ribhoi Synod
 Asst. Secy. : Mr. Lalrinch-

hana Ralte, Mizoram Synod
 Treasurer : Ms. Ibanrihuh
 Synchroniang, KJP Sepngi
 PYF Incharge : Rev. Dr. K. Lal-
 rinkima, Adm. Secretary, PCI
Central Committee member
 : Pu Ginthiansiam, Manipur
 Synod

Editorial Board: Upa Lalzuit-
 luanga, Manipur Synod

PYF Statistic Report :

1. Unit um zat : 11
2. PYF total member : 3,26,512

***PYF Conference apat zil ding
 leh hiat dinga pawimawte :***

1. Pathian in dam ah ima'u ei
 pui ahi chun PYF Youth Camp,
 2020 hi MPYF in zintun ding
 ahi ziakin CKKP inle a paw-
 imaw dan zil ah panla dinga
 kisingsakna nei a ngai hi.
2. Lal Jesu zuitu khat ihi chun
 taksa leh thagau ahin feltak
 ah um ding ahizia muthei in a
 um hi. Gingtu khat chu taksa
 leh thagau ah a fello chun mi
 phakna tiang phak chu thil
 haksa tak ahi.
3. Gingtute chu hun mat thi-
 am a pawimaw hi. A hun leh
 dak kipia hi zui dik a ngai hi.
 Nang leh kei hi a hun leh ni

guattu ihi zia kun a guattute'n
 I zui dikzawlo ahi chun bang-
 tin midangte'n hun zui dik
 thei dinga ahiu em? Kikhawp-
 na dak 6:00pm ah ki guat chu
 dak a git hun ah kisil guapan
 pan ahiloleh zia hun ah chun
 khawlai ah um nalai ihiu chun
 kuama ki delphalo hial dinga
 hi.

4. Khanglaite a dinga chun PYF
 tianga kimatchak ziangna ding
 inle pau leh ham chuleh hiatna
 leh thiamna lam le a mamaw
 takzet hi. Ziaziaka chun Khan-
 glaite hi tununga Kochuam
 puitu dingte ihi zia kun thia-
 mzilna lam ah le kukalna tawh
 panla thak hitiu.

5. A bik takah Khanglaite iki
 tilkho nawpna chu Music,
 Tonic Solfa leh thil githei ah
 Pathian chawihawina lam ah
 matchak thei ding Instrument
 zilna lampang inle panla thak
 kit hitiu. Mi khua leh mitui ah i
 kalsuan phatleh mite'n a thein-
 au leh hiatna'u mangcha Pathi-
 an chawihawi gual ua ei CKKP
 inle Pathian Chawihawina min
 amat uh matchakte manga lim
 leh lam ah um kal ngakla a um

mama hi.

6. Zin bawldan thiam hi a pawimaw mama hi. Min a zinteu sap leh leng gual ah a bawlgualun ei unle bawlvek thei le hin uh ut a um mama hi.

7. Khualgam ah Kikhawpna in ah Smart tak tak ah iki chei sek ua, a hun chet chet in i tung sek ua, kikhawpna a hun a beima pawtlo in i pang ham ham sek ua bang atileh zia gual chiadan ah chu eima'u Khawsung

ahiloleh kochuam ah ikikhawp phat ua leh ki um theilo ahi diam? Kingaitua thakin zui dik gua tai tiu.

Report petu:-

~ Mr. Ginthiansiam
Secretary, CKKP

.....xXx.....

Pauchapna'n deljui jel hitiu:

**2nd DISTRICT TIN
NAUPANG SUNDAY SCHOOL UNION
KHAWMPI-2019**

Ahun: 22nd-23rd June 2019

*Zia Khawmpi ah hin Naupangte'n
Pathian thu ah kibulphuna det tak leh
hawi tak a nei theina ding un kochuamte'n
pauchapna'n deljui jel hitiu.*

'DAMNA AW' PHUNGVUKTUTE :

PATRON MEMBERS :

1. Pu P.Vaiphei IAS, Imphal
2. Upa Henthianthang, S.Kotlian
3. T.Upa Haulallawm S.Kotlian
4. Upa Laltinkhup, HQ. Church, Tuibuang
5. Pi Manliankim, HQ. Church, Tuibuang
6. Nk. Lalsangpui, S.Kotlian
7. Upa D. Mina, Lingsiphai
8. T.Upa Ph. Gena, Lingsiphai
9. Pu. Khamlal Saipum
10. Pu Khamliankap Saipum
11. Pu. S.Kapbawi New Delhi
12. Upa Genhau Central Church,Compound veng
13. Pi Kimtawi Kohima

MEMORIAL GIFT :

1. Pi Deem Melody, **Central Church, (Rengkai)**
[in loving memory of (L) Upa Lamthianlal]
2. Pi Rebekah **Kangvai**
[In loving memory of (L) Pastor Khaivung]
3. Upa Liansomthang **Lingsiphai**
[In loving memory of (L) Pu. Henzagen]Pi
4. Pi. Nem Grace Boisi Capvung **Delhi**
[In loving memory of (L) Pi Vanlalchhuangi]

SUPPORTING MEMBERS :

1. Upa Khomlunlal S.Kotlian,
2. Pu. S.Thangminlian Lingsiphai,
3. Pu Lelboi, Lingsiphai
4. T.Upa Lalneilian Central Church,
5. Pu EL Soson Central Church
6. T.Upa Genminthang, Central Church,
7. Pi Kimneihawi Saipum
8. T.Upa J. Mark Saipum
9. Pu Genthiankap, Nghathal
10. Pu Lianzakhup Nghathal.
11. Pu Lemthang L.Mission Veng
12. Rev. S.T.Kaia Vaiphei Nghathal

ENCOURAGERS :

1. Pu P. Kamneilian, Lingsiphai
2. Evan Thianlam Lingsiphai

3. Pastor Kaiminlian,	L. Saronphai
4. Upa K.Thanga,	Kangvai
5. T.Upa Manglem,	Kangvai
6. Upa S.Bela Capvung,	Kangvai
7. T.Upa David,	HQ Church, Tuibuang
8. T.Upa Khupneu,	HQ Church, Tuibuang
8. T.Upa Zamthamuan	HQ Church. Tuibuang
10. Pu Lamthianlun,	Central Church, Compound Veng,
11. Pu Vendam,	Central Church, Compound Veng,
12. Pu Haudal,	Nghathal
13. Pu Khamliankhual,	Nghathal
14. Pi Mary Vaiphei,	Nghahal
15. Upa Paukholam	Nghathal
16. Pu Tongzahem	Nghathal
17. Pi. Nunmawi	Nghathal
18. Pu Kaikham	Saipum
19. Pu Pauthianlal @ Mengpu,	Saipum
20. Upa Ginneithang,	Saipum
21. Pu Donggen	Saipum
22. T.Upa. Lallawmthang	Saipum
23. Pu.Damthang	Saipum
24. Upa Kaijuanthang	Tangmual
25. Rev. Haulalven	Tangmual
26. Pu Gomang	Tangmual
27. Pu Kamneilal	Tangmual
28. Pu Kaisawmlal	Tangmual
29. Pu Thangneilun	Tangmual
30. Pi Niangphal	Bisanmual
31. Upa Thangpu Changsan	Leimakhong
32. Pu. Kham sawngolian	Kohima

Damna Aw monthly magazine hi tutiang ahin kochuamte'n phungvukna i bawlte'u ziaka hin chiazel i hiu a, kuale phungvukna bawl utte a ding in bangtik lai in le bawlthei zing ahi.

- (i). Patron member- Kum 3 (three) a ding in ₹. 3,000/-
(ii). Supporting member- Kum 2 (two) a ding in ₹. 2,000/-
(iii). Memorial Gift- Kum 2 (two) a ding in ₹. 2,000/-
(iv). Encourager- Kum 1 (one) a ding in ₹. 1,000/-

Chun, sum thawt nuamte a ding in:

A/C name: Khuga Sadar Presbytery (MPCS)

A/C nos: 32483318505

Branch code: 6182, ccpur